


Burgais-democrats prendan las parolas da votaziun

Radunanza da delegads da la Partida burgais-democratica a Claustra

■ (mc) La Partida burgais-democratica dal Grischun ha prendì mesemna saira a Claustra las parolas per las votaziuns naziunalas e chantunalas dals 22 da settember. La pbd di na a l'aboliziun da l'obligaziun da far militar, gea a la lescha d'epidemias e gea a la lescha da lavur. Tar l'iniziativa «energia senza charvun» èn delegadas e delegads sa decidids cleramain a favur da la cuntraproposta.

Votaziuns naziunalas

Deputà *Heinz Dudli* ha referì davart l'iniziativa populara «gea a l'aboliziun da l'obligaziun da prestar servetsch militar» ed ha recumandà da refusar ella. Ils custs supplementars che sa resultassan en in cas da catastrofes per chantun e vischnancas fissan considerabels senza l'agid da l'armada. Ulteriuras consequenzas negativas fissan l'acceptanza sminuinda da l'economia per tals che fan voluntariamain militar e la necessitad da midar la constituziun en il cas che la situaziun da segirezza sa mida èn stads ils arguments principals che deputà *Heinz Dudli* ha menziunà cunter l'iniziativa. Delegadas e delegads han refusà unanimitamain l'iniziativa per dismetter l'obligaziun da prestar servetsch militar.



Gea a la nova lescha d'epidemias

A la lescha federala che datescha dals 28 da settember 2012 davart il cumbat cunter malatias contagiusas tar ils umans han delegadas e delegads ditg gea. Deputà *Urs Hardegger* ha recumandà da sustegnair la lescha che s'orientescha a la lescha vertenta. Meglierada puntualmain

vegn la repartiziun da las incumbensas tranter la confederaziun ed ils chantuns. Delegadas e delegads èn s'exprimids cun gronda maiortad a favur da la lescha.

Gea a la lescha da lavur

Deputà *Andreas Felix* ha orientà davart la midada da la lescha federala davart la la-

vor en industria, mastergn e commerzi. *Andreas Felix* ha rendì attent ch'i na s tractia betg d'ina votaziun da princip davart la liberalisaziun dal temp d'avertura da tut la stizuns, mabain sulet d'ina dumonda dal sortiment en ils 24 shops ch'existan en Svizra. Ils delegads han er acceptà e recumandà quest project.

Na a l'iniziativa da charvun e gea a la cuntraproposta

Tar la votaziun chantunala davart l'iniziativa «Energia schubra senza charvun» èn ils delegads s'exprimids cleramain cunter l'iniziativa e per la cuntraproposta. Il president da partida e co-president dal comité cunter l'iniziativa e per la cuntraproposta *Jon Domenic Parolini* ha orientà davart ils privels da l'iniziativa e davart ils avantatgs da la cuntraproposta. Sche l'iniziativa vegnia acceptada mettia quai en privel posts da lavur attractivs en il Grischun che sajan engaschads sin plaun internaziunal ed ins ristgia la finala ch'il chantun stoppia vender sia participaziun vi da Repower. «I na po betg esser che la politica midia posteriuramain las reglas da giu e cumondia a l'interpresa grischuna che lavura cun grond success co e nua ch'ella ha d'investar en l'exteriur», ha accentuà *Parolini*. La cuntraproposta garanteschia che il chantun possa restar vinavant acziunari principal da Repower, impedeschia in scumond da sviluppar vinavant la tecnologia e permetta che la strategia da success dal chantun sin il champ da l'energia possa vegnir cuntinuà. Il schef operativ da Repower *Kurt Bobst* ha accentuà l'importanza da questa decisiun politica per l'interpresa.

Referents tals burgais-democrats dal Grischun: da san. **Heinz Dudli, Kurt Bobst, Jon Domenic Parolini, Urs Hardegger ed Andreas Felix.** MAD